

Leta Iviva Jon Le Rorori Utu iviva

Buk Boboma gharaghareghare thi renuwana letake iyake ghararorori iye Jon, Sebedi nariye. Iye Jisas ghalinae gharaghambi regha na amalaghiniye vambe i roriva buk Jon. Jon va i roriya letake iyake kaiwae ravavaghare kwanikwan vavana va inanzi ekelesiya wabwiko e tinenji. Thiye va thijava yambaneke bigibiginiye iya valikaiwae ra vighathingi thiye thari le valivanga, ko iyemaenge nyao lenji valivanga, iya ma valikaiwae ra vighathingi, thiye thovuye le valivanga. Iya kaiwae thijava Jisas mbe regha, na Krai mbe regha. Thija Jisas iye lolo — yambaneke biginiye iyako, thari le valivanga. Na thija Krai iye nyao, nyao biginiye iyako, thovuye le valivanga. Thijava Krai va i mena weya Loi na i ru weya loloko Jisas na i yakuwe. Kaero thijava Jisas iye ma Loi Nariye ngoreiye, ma Krai e rana ma Mesaiya ngoreiye. Renuwana vatharike iyake kaiwae, Jon i roriya letake iyake na i vavurighheghengiye ekelesiya vavaghareko iyava thi rikowe na thi lonwe, thi njimbukiki (ngoreiya 2:24). Na tembe injava Jisas iye Mesaiya, Loi Nariye, iyava i mena e yambaneke na i tabo na lolo (2:22; 4:2, 14-15; 5:1,6).

Ravavaghare kwanikwan vavana thijava Jisas

le bapitaiso e tine nyao Kraisi i mena na i ru weya lolo Jisasi na i yakuwe, na nyao Kraisi i roiteta lolo Jisasi amba muyai i mare. Vangothiye 5 righe 6 e tine Jon i govawoya nuwanji ina, "Jisasi Kraisi iye lolo moli, i bapitaiso na i vakatha le kaiwo i wa ghaghad ve mare. Iye mbe ghamberegha vara e riwaeko moli i mare."

Ravavaghare kwanikwan tevambe thinjawa iya the vakatha ra vakavakatha ma gharerenuwana i reja unendake e ghavamoru, kaiwae vakatha ra vakatha mbe yambaneke biginiye, ko iye-maenge vamoru mbe nyao biginiye. Ko iye-maenge Jon i vavurighheghengiye ekelesiya na thava thi vakatha thari thanavuniye (ngoreiya 2:1; 3:7-8), ko iyemaenge thi ghambugha Loi le mbaro (2:3-4).

Reghava ravavaghare kwanikwaniko thinjawa lenji ghareghare thuwele regha mbe inawe na iyako i ghatha vakathangi wengiye lenji vali Kristiyaniko wolaghiye wengi. Na thiye thi yaku na ma namoghamwanji wengiye ghanjiuneko. Renuwana laghiye regha Jon i rori e letake iyake tine iyake: ralonwelonweghathi mbe thi gharethovu wengiye oghaghanji na olounji (ngoreiya 3:14; 4:20-21).

Utuke iya i giya yawalindake

¹ Utuke iya i giya yawalindake kaiwae wo rori e ghemi. Amba muyai bigibigike wolaghiye thi yomara amalaghiniye kaero inawe. Ghime va wo lonweya ghalinae, wo thuwe e marame, wo ghewonja na wo vighathi e nimame.

² Yawalike righe iyake va i yomara, wo thuwe, iya kaiwae wo utuuta utuniye na wo vavaghareña e ghemi iya yawalike memeghabananiyeke iyake. Va mbowo weiye Ramae thi yaku, ko Loi te vambe i vakatha na i yomara weime.

³ Loloke iyake va wo thuwe na wo lonweya ghalinae iya wo utuuta utuniyeke e ghemi, kaiwae nuwameiya ra tubweinda na regha weindangiya Ramanda na Nariye Jisas Krai.

⁴ Lama righe na wo roriya letake iyake e ghemi kaiwae nuwameiya weimangiya ghemi warari i riyevanjarainda.

Ra longalonga e manjamanjala

⁵ Ko iyemaenge totoke iyava wo lonwe weya Jisas Krai na wo utuna e ghemi ngoreiyake: Loi iye manjamanjala na ma momouwo regha inawe.

⁶ Iya kaiwae thonjo rana ra tubwe na regha weinda, ko mbe inanda ra longalonga e momouwo, ela utuutu na e la vakatha ra kwana ghinda.

⁷ Ko thonjo ra longa e manjamanjala ngoreiya amalaghiniye ina e manjamanjala, amba ra tubweinda na regha, na Nariye Jisas madibae i thavwiyathu la tharike wolaghiye na ra kakaleva.

⁸ Thonjo ghandamberegha ra utunainda na rana ma e la thari, tembe ghandambereghava ra yaroinda, na utu emunjoru ma ina weinda.

⁹ Ko thonjo ra worangiya la thari weya Loi, iye gathanavu i thovuye na i utuutu emunjoru na valikaiwae ra vareminje, ne i numoteninda

na i thavwiyathu ghandathanavuke raraithari wolaghiye na ra kakaleva.

¹⁰ Thonjo ra utu na rana, “Ghino ma ya vakatha mun thari,” kaero ra wovakwanikwanija Loi, na ma ra wovatha le utu na i yaku weinda.

2

Jisas iye ghandarathalavu

¹ Lo njanja, ya roriya letake iyake na i ghaona e ghemi kaiwae ma nuwanguiya hu vakatha thari regha. Ko thonjo ghinda regha i vakatha thari, ghanda Rathalavu regha mbe inawe, iye lolo thovuye moli Jisas Krais. Iye i utuutu ghinda kaiwanda weya Loi Ramanda.

² Iye la thari vowoniye. Mava i mare mbe ghinda enge la thari kaiwae, ko iyemaenge va i mare gharigharike wolaghiye e yambaneke laghiye la thari kaiwae.

³ Thonjo ra ghambugha Loi le mbaro, ne ra ghareghare emunjoru mbema ra ghareghare amalaghiniye.

⁴ Thonjo lolo regha inja, “Ya ghareghareya Loi,” ko iyemaenge ma i ghambugha le mbaro, iye rakwan na utu emunjoru moli ma inawe.

⁵ Ko thonjo thela i ghambugha Loi le utu, le gharethovuko weya amalaghiniye kaero i vamboromborona. Ra ghareghare thonjo emunjoru ra tubwe weya Loi:

⁶ thonjo rana ra yaku weya Loi la vakatha nasiye na laghiye mbala ngoreiya Jisas le vakatha.

Gharethovu na manjamanjala

⁷ Wouna na valigharegharengu, mbaroke iya ya rororike e ghemi ma mbaro togha ngoreiye. Iye mbaro teuye, i ri mbanja va hu lonweghathigha Kraiss na thi utunja e ghemi. Iye iya vavaghareniye vama thi utunja na hu lonwena.

⁸ Ko iyemaenge mbaroke iya ya rororike e ghemi iye togha. Ghavaemunjorunja ra thuwe weya Kraiss na ra thuwe e ghemi. I togha kaiwae gougou ghambanja kaero ikoko na manjamanjala emunjoruniye i mbile.

⁹ Thela thonjo ina, "Ghino kaero ya yaku e manjamanjala," na thonjo i thighiyawana ghaghae, amalaghiniye amba ina e momouwo tine.

¹⁰ Thela thonjo i gharethovu weya ghaghae, iye i yaku e manjamanjala, na ma thari regha inawe, mane i vakatha gheu regha na i vakatha thari.

¹¹ Ko thela thonjo i thighiyawana ghaghae, iye kaero i yaku e momouwo tine. I lonjalonga mbe e momouwo tine enge na ma i ghareghare anja i reja, kaiwae momouwoko i vakatha marae thi kwaghe.

Tha hu gharethovu wenjiya yambaneke bigibiniye

¹² Lo nganga, ya rorori e ghemi,
kaiwae Jisas Kraiss e idae Loi kaero i numotena lemi thari.

¹³ Amaamala, ya roriya utuutuke iyake e ghemi,
kaiwae Kraiss, vama inawe ngorava i rikowe,
kaero hu ghareghare amalaghiniye.

Thegha, ya roriya utuutuke iyake e ghemi,
kaiwae loloma raithari Seitan kaero hu
kivwala.

¹⁴ Gamagai, ya roriya utuutuke iyake e ghemi,
kaiwae Ramami e buruburu kaero hu
ghareghare wagiya.

Amaamala, ya roriya utuutuke iyake e ghemi,
kaiwae Krais, vama inawe ngorava i rikowe,
kaero hu ghareghare amalaghiniye.

Thegha, ya roriya utuutuke iyake e ghemi,
kaiwae hu vurigheghe. Loi le utu i yaku e
ghemi
na loloke raithari Seitan kaero hu kivwala.

¹⁵ Tha hu gharethovuṅa yambaneke na bigibiginiye. Thonḡo hu gharethovuṅangi, Ramami e buruburu mane ghagharethovu ina e ghemi.

¹⁶ Yambaneke bigibiginiyeke thiyake; thanavuko iya nuwandaiyako; maralogheloghe, bigibigi na vwenyevwenye ghanjinemo. Bigibigike wolaghiye thiyake ma thi mena weya Ramanda Loi, mbe thi rakamena enge vara e yambaneke.

¹⁷ Yambaneke thanavuniye na bigibiginiyeke wolaghiye iya gharigharike nuwanjiya thiye ne thiko, ko thela i vakatha ngoreiya Loi le renuwaṅa, iye i roghabana na ma mbaṅa regha ne iko.

Krais ghathighiyangi

¹⁸ Lo nḡaṅga, mbaṅa le ghambako maiyavara! Kaerova wo utuvenḡa Krais ghathighiya maiya i menamenake, na othembe mbanake Krais ghathighiya lemoyo kaerova thi yomara. Iya

kaiwae ra ghareghare mbanja le ghambako kaero i gheneghenetha.

¹⁹ Thiye va inanji e la wabwike tine, na kaero thi rakaiteteinda, ko kaiwae thiye ma la wabwike gharighariniyengi moli; mbala amba inanji weinda, ko kaero thi rakarangi na lenji rangi e la wabwike tine i worangiya weinda thiye ma la wabwike gharighariniye.

²⁰ Ko iyemaenge ghemi, Krais kaerova i lingiya Nyao Boboma e ghemi, iya kaiwae taulaghina ghemi hu ghareghareya utu emunjoru moli.

²¹ Lo rorori e ghemi ma righe kaiwae ma hu ghareghareya utu emunjoru moli, nandere. Ko lo righe na ya rorori e ghemi kaiwae kaero hu ghareghare utu emunjoru moli, na hu ghareghare utu kwanikwan ma i mena utu emunjoru e tine.

²² Thela rakwan? Rakwan iya loloniye inja, "Jisas iye ma Krais ngoreiye." The lolo i utu ngoreiyako, iye i botewongiya Loi Ramanda na Nariye, na iye Krais ghathighiya.

²³ The lolo thongo i botewoyathu Loi Nariye, Ramae ma inawe. Thela thongo i vanjovatha Loi Nariye e ghare, tembe i vanjovathava Loi Ramae.

²⁴ Hu njimbukiki na hu worawe e gharemina utuutuko emunjoruko, iyava i ri mbananiye va hu lonweghathi na thi utuja na hu lonwe. Thongo i yaku e gharemina, ghemi ne hu tubwe wengiya Loi Nariye Jisas na Ramae.

²⁵ Na Jisas kaerova i dagerawe weinda, ne i giya yawali memeghabananiye weinda.

26 Ya rorinjona utuutuke iyake e ghemi na ya utuvennga thiyena nuwanjiya thi yaronjana kaiwanji.

27 Ko iyemaenge ghemi Krai kaerova i lingiya Nyao Boboma e ghemi na mbanake mbe ina e ghemi. Iya kaiwae ma valikaiwae tembe hu tamweva ravavaghare reghava na i vavaghare e ghemi. Kaiwae Nyao Boboma i vavaghare bigibigike wolaghiye e ghemi, na le vavaghare mbema emunjoru enge, ma i kwan mun. Iya kaiwae hu yaku weya Krai ngoreiya Nyao Boboma i vagharenjana.

Loi le nganga ghinda

28 Lo nganga, hu yaku weya Krai, na mbala ghambana i njoghama, gharenda mbe i matuwo enge na thava ne weinda la monjina ra ndeghati e marae.

29 Thongo hu ghareghare Krai iye lolo thovuye moli, kaero hu ghareghare thela i vakavakatha thanavu thovuye, iye Loi nariye.

3

1 Wo hu thuwe, Loi le gharethovu weinda, i laghiye yo! Le gharethovuko iyako kaiwae weinda, inja, "Ghemi lo nganga." Mbwana ghinda ngoranda iyako. Ko kaiwae yambaneke gharighariniye ma thi ghareghareya Loi, ma thi ghareghareya ghinda Loi le nganga.

2 Wouna na valigharegharengu, mbanake iyake Loi le nganga ghinda, ko iyemaenge amba ma ra ghareghare ngoronga vole ghandayamoyamo. Ko ra ghareghare enge mbanja Krai ne i

njoghama, ne ra thuwe e ghayamoyamo moli, na ghinda ne ngoranda amalaghiniye.

³ Thela i ghamaraghaoko e ghamwaeko weiye gharematuwo na i thuweya Krai, iye i njimbukikiya gathanavu, thava thari inawe, ngoreiya Krai ma ele thari mun.

⁴ Thavala thi vakavakatha thari thanavuniye thiye thi rakaraka Loi le mbaro. Thari thanavuniye iye ra botewoyathu Loi na le mbaro.

⁵ Kaero hu ghareghare wagiawe Krai va i mena righe moli i rakayathuinda thari e tine, na hu ghareghare ma mbanja regha i vakatha thari.

⁶ Iya kaiwae thavala thi yaku weya Krai ma thi vakavakatha thari. Ko thavala thiye ravakavakathangi, ma mbanja regha thi thuwe na thi ghareghare amalaghiniye.

⁷ Lo nganga, tha lolo regha i utuutu vagaghala nuwami. Thela thongo i vakavakatha thanavu thovuye, iye lolo thovuye; iye ngoreiya Krai iye lolo thovuye.

⁸ Ko thela i rombeleya thari thanavuniye, iye Seitan nariye, kaiwae va i rikowe na ghaghad noroke Seitan mbe i vakavakatha vara thari. Loi Nariye le yomara righe nuwaiya i mukuwa Seitan le kaiwo.

⁹ Thela thongo kaero i tabo na Loi nariye ma tembene i vakavakathava thari, kaiwae yawaliko iya i menako weya Loi inawe. Ma valikaiwae mbe i vakavakatha vara thari kaiwae Ramaya Loi.

¹⁰ E kamwathike iyake ne i vatomwe emunjoru weinda, thavala Loi le ngangangi na thavala Seitan le ngangangi. Thavala ma thi vakatha

thanavu thovuye, thiye ma Loi le nḡanḡanḡi, na thavala ma thi ḡharethovu wenḡiya oḡhaghaji, thiye ma Loi le nḡanḡanḡi.

Ra vėharethovu weinda

¹¹ I ri va mbananiye hu lonweghathi, vav-aghareke iyake va hu wo, i utu ḡgoreiyake: hu vėharethovu wenḡa.

¹² ḡhamithanavu thava ḡgoreiya Kein, iye lolo raithari, Seitan nariye. Va i tagavamara ḡhaghae moli. Na buda kaiwae va i tagavamara ḡhaghae? Kaiwae amalaghiniye le vakatha va i thari na ḡhaghako le vakatha i thovuye Loi e marae.

¹³ Lo bodaboda, ḡharemi tha i yo, thonḡo yambaneke ḡharighariniye thi botewoyathunḡa.

¹⁴ Thonḡo ra ḡharethovu wenḡiya oḡhaghanda kaero ra ḡhareḡhare mare le valivanḡa kaero ra itete na ra lawa yawali memėghabananiye ele valivanḡa. Ko thela thonḡo ma i ḡharethovu weya ḡhaghae iye mbe ina vara mare ele valivanḡa.

¹⁵ Thela i botewoyathu ḡhaghae iye ratagavamare, na kaero ra ḡhareḡhare ratagavamare ma yawali memėghabananiye inawe.

¹⁶ Krai va i vatomweya yawaliye kaiwanda, na le vakathako iyako e tine ra ḡhareḡhare ḡharethovu thanavuniye. Na ḡhinda tembe ḡgoreiyeva, ra vatomweya yawalinda la valiralonwelonweghathi kaiwanji.

¹⁷ Thela thonḡo iye bigibigike wolaghaye i mboromborowe na i thuweya ḡhaghae bigibigi vavana i ḡhenethavwiwe, ko iyemaenḡe ma

ghare i njawe na i thalavu, iye Loi le gharethovu ma inawe.

¹⁸ Lo nḡanḡa, thava mbe e ghaendake njimwa enḡe ra gharethovu, mbe ra gharethovu emunjoru weiye la vakatha.

¹⁹ Thonḡo emunjoru ra vegharethovu weinda ḡoreiyako, ne ra ghareghare emunjoru ḡhinda inanda weya Loi kaiwae iye i vatomwe iyanḡaniya i thovuye na emunjoru. Na thonḡo emunjoru moli ra vegharethovu weinda, mane ra numogheḡeiwo e la ḡhamba ndeḡhathi weya Loi,

²⁰ othembe renuwaḡa e ḡharendake ne i woranḡiya weinda ḡhinda thari ḡharavakatha, ne weinda la ḡharemalili kaiwae ra ghareghare wagiya we Loi iye i ghareghareinda moli i kivwala ḡhinda la ghareghare ḡharendake le renuwaḡa, na kaiwae iye i ghareghareya la vakathake wolaghiye.

²¹ Iya kaiwae, wouna na valighareḡharenḡu, mbaḡa ra ghareghare la renuwaḡa e ḡharendake ḡhinda ma thari ḡharavakatha, na ma ra mararu mbaḡa ne ra nanḡo weya Loi,

²² na ne i vamboromboroḡa weinda budakaiya ne ra nanḡowe kaiwae ra ḡhambugha le mbaro na ra vakatha thanavuko iya amalaghiyiye i warari kaiwaeko.

²³ Le mbaro ḡoreiyake: Ra lonḡweghathigha Nariye Jisas Krai na ra vegharethovu weinda ḡoreiya mbaroko va i utunḡako weinda.

²⁴ Thavala thi ḡhambugha Loi le mbaro, thi yakuwe na iye i yaku wenḡi. Na i ḡiya Une na i yaku weinda, iya kaiwae ra ghareghare iye i

yaku weinda.

4

Ra tuthiya Loi ghalinae gharautu lenji utu

¹ Wouna na valigharegharengu, tha hu lonweghathigha lolo regha thonjo inja Loi Une inawe, iyemaenge wo hu ghatha vakatha budakaiya i utunana, amba ne hu ghareghare thonjo mbema emunjoru Loi Une inawe, kaiwae e valivanlake wolaghiye ghalinae gharautu kwanikwan lemoyo kaero thi rakarangi, na thiye thijava thi utuna toto thi wo weya Loi.

² Loi Une ghaghareghare ne hu ghareghare ngoreiyake. Thonjo lolo regha inja Jisas Kraisa va i tabo na lolo na i njama e yambaneke, iye Loi Une inawe.

³ Ko thela thonjo inja Jisas mava i tabo na lolo na i nja e yambaneke, iye Loi Une ma inawe, iye Kraisa ghathighiya na une ma inawe. Kaerova hu lonwe iye iya i menamenake, kaerova i menake na e mbanake iyake ina e yambaneke.

⁴ Ko iyemaenge lo nganga, ghemi Loi le gharighari, Loi ghalinae gharautu kwanikwaningi kaero hu vurigheghe kivwalangi, kaiwae Nyaona iya inana e ghemi i vurigheghe moli i kivwala nyaona ina wengiye gharighari e yambaneke.

⁵ Ghalinae gharautu kwanikwan thiye yambaneke gharighariniyengi, iya kaiwae lenji utuko mbe yambaneke renuwaniye enge na yambaneke gharighariniye thi lonweghathigha lenji utuko.

⁶ Ko ghinda Loi le gharighari, na le renuwana e tine ra utuutu na thavala thi ghareghareya Loi thi lonweya ghalinanda, ko thavala ma Loi le gharigharingi ma thi lonweya ghalinanda. Na iyake e tine valikaiwae ra ghatha iyanganiya utu emunjoru une na iyanganiya utu kwanikwan une.

Loi iye ragharethovu moli

⁷ Wouna na valigharegharengu, mbe ra vegharethovu weinda, kaiwae gharethovu thanavuniye i mena weya Loi. Thela thongo i gharethovu iye Loi nariye na i ghareghareya Loi.

⁸ Thela thongo ma i gharethovu, iye ma i ghareghareya Loi iye ragharethovu.

⁹ Loi le gharethovu weinda i vaghareinda ngoreiyake: I variya Nariye ghambergha moli na i nja e yambaneke na amalaghiniyewe ghinda ra vaidiya yawalinda memeghabananiye.

¹⁰ Ma rana gharethovu moli thanavuniye ra thuwe e ghinda la gharethovu weya Loi, ko iyemaenge ra thuweya iye le gharethovu weinda na i variya Nariye la thari vowoniye.

¹¹ Wouna na valigharegharengu, Loi le gharethovu laghiye weinda ngoreiye varako, na valikaiwae ghinda tembe ra vegharethovuva weindava.

¹² Ma mbanja regha lolo regha i thuwathuwa weya Loi, ko iyemaenge thongo ra vegharethovu weinda, Loi i yaku weinda na la gharethovu weya amalaghiniye kaero i vamboromboro.

¹³ Kaero ra ghareghare ghinda ra yaku weya Loi na amalaghiniye i yaku weinda, kaiwae i giya Une weinda.

¹⁴ Tembe ngoreiyeva, va wo thuweya Loi i variya Nariye e yambaneke na i vamoruᅅgiya gharighari lenji thari e tine, na iyake wo vaemu-njoruᅅa moli wenᅅgiya gharighari.

¹⁵ Thonᅅo lolo regha iᅅa, “Jisas iye Loi Nariye,” iye kaero i tubwe weiye Loi na Loi iye tembe i tubwewevea.

¹⁶ Na tembe ngoreiyeva kaero ra ghareghare Loi iye i gharethovu kaiwanda na ra vareminje iye i gharethovuᅅainda mbanake wolaghiye. Loi iye ragharethovu, thela thonᅅo i yaku e gharethovu na iye ragharethovu, iye i tubwe weya Loi na Loi i tubwe weya amalaghiniye.

¹⁷ Ne ra ghareghare Loi le gharethovu kaero i vakathavao kaiwoke wolaghiye nuwaiya i vakatha weinda, mbala ma ra mararu Loi mbananiye ne i ghathangiya gharighari, kaiwae la yakuyaku e yambaneke ngoreiya Krai ghathanavu.

¹⁸ Thonᅅo ra gharethovu weya Loi na iye i gharethovu weinda, mane ra mararu amalaghiniye. Thonᅅo ghinda la gharethovu i laghiye na kaero i mboromboro, gharethovuko thanavuniye iyako i wokiyathu mararu ghaminae, kaiwae mararu i rangiwe thonᅅo ra renuwaᅅa Loi le lithi weinda. Ko the lolo thonᅅo i mararu ra ghareghare le gharethovu amba ma i laghiye na i mboromboro.

¹⁹ Ghinda ra gharethovu wenᅅgiya Loi na gharighari, kaiwae iviva Loi i gharethovu weinda.

²⁰ Thonᅅo lolo regha iᅅa, “Ya gharethovu weya Loi,” ko iyemaenᅅe i botewoyathu ghaghae, iye

rakwan. Kaiwae thonngo ma i gharethovu weya ghaghaeko iya i thuwe e maraeko, ma valikaiwae i gharethovu weya Loi iya ma i thuwe e maraeko.

²¹ Na mbaroko iya Loi va i giyako weinda inja, “Thela thonngo i gharethovu weya Loi, tembe i gharethovu weva ghaghae.”

5

La lonweghathi weya Loi Nariye

¹ Thavala thi lonweghathi Jisas iye Kraiss, thiye Loi le ngangangi. Thonngo ra gharethovu weya ramanda tembe ra gharethovu wengiva oghaghandana olounda.

² Kaero ra ghareghare thonngo ra gharethovu weya Loi na ra ghambugha le mbaro, tembe ra gharethovu wengiva le nganga.

³ Thonngo emunjoru moli Loi ghagharethovu ina weinda, ne ra vakatha ngoreiya budakai i utugiya weinda na ra vakatha. Ma tembe i vuyowova weinda budakai i utuja na ra vakatha,

⁴ kaiwae Loi le nganga ghinda valikaiwanda ra kivwala yambaneke. La righe na valikaiwanda ra kivwala yambaneke kaiwae ra lonweghathigha Jisas.

⁵ Thavala valikaiwanji thi kivwala yambaneke le vurigheghe? Mbe iyaenge vara thavala thi lonweghathigha Jisas iye Loi Nariye.

⁶ Mbema Jisas Kraiss iya amalaghiniye va i njama e yambane, i bapitaiso e mbwa, amba i mare na madibae i voru. Ma vambe i mena enge i bapitaiso e mbwa, ko va i mena i bapitaiso e

mbwa na tembe i mareva na madibae i voru. Nyao Boboma i utunja iyako na utuko iyako emunjoru kaiwae amalaghiniye rautu emunjoru moli.

⁷ Rautuutu Jisas kaiwae thegheto:

⁸ Nyao Boboma, le bapitaiso na le mare na madibae i voru. Theghetoke iyake lenji utuke i mboromboro.

⁹ Ghinda ra lonweghathigha gharighari thonjo thi utunja bigi regha utuniye, ko iyemaenge Loi le utuutu i kivwala gharighari lenji utuutu, iya kaiwae mbala ra lonweghathi. Na iye kaero i utunja Nariye utuniye.

¹⁰ Thela thonjo i lonweghathigha Loi Nariye, kaero i ghareghare Loi le utuutuko iyako i emunjoru moli. Ko thela ma i lonweghathigha Loi le utuutuko, iye kaero i wovakwanikwanija Loi kaiwae Loi le uturanyiya Nariye kaiwae ma i lonweghathi.

¹¹ Loi le uturanyiyako iyako ngoreiyake: Loi kaero i giya yawali memeghabananiye weinda, na yawaliko iyako righe iye Nariye.

¹² Thela i wovatha Loi Nariye, iye yawalike iyake kaero inawe; thela ma i wovatha Nariye, yawalike iyake ma inawe.

Ututuke ghagovun

¹³ Ya roriya letake iyake e ghemi kaiwae nuwanjuiya hu ghareghare thavala ghemi kaero hu lonweghathigha Loi Nariye kaero hu wo yawali memeghabananiye.

¹⁴ Weinda la gharematuwa ra mena weya Loi e nanjo, kaiwae ra ghareghare emunjoru ne i wovatha la renuwana thonjo thebigiya

nuwandaiya ra nangowe na mbe ngoreiye vara amalaghiniye le renuwaᅇa.

¹⁵ Kaero ra ghareghare ma mbaᅇa regha i goriwoyathuinda, mbaᅇa ra nangowe ra ghareghare kaero i giya thebigiya ra nangowe.

¹⁶ Thongo ghemi regha i thuweya ghaghae i vakatha thari, thariko iya mane i vakatha na i meghaghathi moli weya Loi, mbala i nango weya Loi thariko gharavakatha kaiwae na Loi i vamoru. Iyake ya utuutu thavala thi vakatha thari na mane i vakatha na thi meghaghathi moli weya Loi. Emunjoru thari vavana mbe inanjiwe, i vakatha lolo i meghaghathi moli weya Loi. Ma yaᅇa i nango thari ngoranjiyako kaiwanji.

¹⁷ Vakathake raraithari wolaghiye idanji thari. Ko iyemaenge thari vavana mbe inanjiwe mane i vakatha lolo i meghaghathi moli weya Loi.

¹⁸ Ra ghareghare thela kaero i tabo na Loi nariye, mane i vakatha valaᅇa thari, kaiwae Loi Nariye i njimbukiki, na Seitan, iye thari gharavakatha mane i vighathi.

¹⁹ Kaero ra ghareghare Loi le ngaᅇga ghinda, na yambaneke laghiye thari gharavakatha Seitan i mbaroᅇa.

²⁰ Kaero ra ghareghare Loi Nariye va i mena e yambaneke na i giya ghareghare weinda, iya kaiwae ra ghareghareya Loi emunjoru moli. Ra tubwe weya Loi emunjoru moli na tembe ra tubwe weva Nariye Jisas Krais. Iye Loi emunjoru moli na yawali memeghabananiye righe.

²¹ Lo ngaᅇga, thava hu kururu wengiya loi kwanikwan, hu botewoyathungi.

Toto Thovuye Loi Ghalinae
Portions of the Holy Bible in the Sudest language of
Papua New Guinea
Buk Baibel long tok ples Sudest long Niugini

copyright © 2014 Wycliffe Bible Translators, Inc.

Language: Sudest

Dialect: Tagula

Translation by: Wycliffe Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-09-23

PDF generated using Haiola and XeLaTeX on 18 Apr 2025 from source files dated 31 Aug 2023

7a63d67b-b890-5db0-8880-b6fd64f3b62f